

Sondag 8 Januarie

Skrifgedeelte: Matteus 3:1-12

Fokusgedeelte: Matteus 3:11

Jesus doop almal

Van oraloor, van Jerusalem, van Judea en die omstreke van die Jordaan kom mense na Johannes om deur hom gedoop te word. Hy doop egter nie almal nie, net hulle wat bereid is om hulle sondes te bly en hulle te bekeer en vir die koms van die Messias gereed te maak.

Wanneer die Fariseërs en Sadduseërs na hom toe kom om gedoop te word, wys hy hulle beslis weg: “Addergeslag, wie het julle aange-wys om te vlug vir die toorn wat aan die kom is? Dra dan die vrugte wat by die bekering pas.”

Daarmee waarsku hy hulle dat hy maar net met water doop tot bekering, maar ná hom kom Hy wat hulle met die Heilige Gees en met vuur sal doop. Hy doop almal óf met die Heilige Gees óf met vuur. Jesus doop hulle wat deur God se genade hulle skuld bely en hulle verlossing buite hulleself in Hom as Verlosser soek, met die Heilige Gees.

Hy skenk aan hulle ’n nuwe hart as wedergebore kinders van God en erfgename van die koninkryk van die hemele.

Hulle wat egter onbekeerd God en sy genade in Jesus Christus verwerp, doop Hy met vuur. Vuur is die beeld van God se heilige toorn oor sondaarmense.

Jesus is daarin as God se Regter soos ’n boer wat sy graaf in sy hand het. Met die graaf maak Hy die dorsvloer deur en deur skoon sodat geen enkele deel op die dorsvloer oorbly nie. Die koring bring hy in sy skuur bymekaar en die kaf sal hy met vuur verbrand. Geen mens sal ongedoop bly nie. Hy word met die Gees gedoop tot redding, of met vuur tot veroordeling.

Jy wat jou toevlug tot Jesus geneem het, is met die Gees gedoop. Dra dan die vrugte wat by jou bekering pas. Die vrug van die Gees is liefde, blydskap, vrede, lankmoedigheid, vriendelikheid, goedheid, getrouheid, sagmoedigheid, selfbeheersing (Gal. 5:22).

Sing: Psalm 38:1, 15

Ds. DJ (Daan) Bakker (Boksburg)